

Resumen:

Este cuento trata acerca de una mujer que se convertía en cigüeña y que le chupaba la sangre a los niños recién nacidos. Hubo una ocasión cuando le chupó la sangre a un recién nacido, hijo de un rancharo que vivía en un potrero lejos del pueblo. Entonces aquel rancharo la mató con un rifle, por eso la gente sabe que la cigüeña era una bruja que vivía en medio de un bosque.



Pumatam t'aku ma xwilh lakatam lakaak'iwin ma ancha ixyajuta ixcha'a'. Ma ntu a'tam ix'aktujukan ma wa lakalulhucha ixt'ajun an t'aku', chi anchunu t'aku ma sawalh ay ixjunita.

Akxni ma ixcha'ancha jaytatnan, ma ix'ulaycha an ixtan'ajni ixcha'a ma jikmi chi akxni ma lam lamcha antalhi an jikmi ma anchacha ixtayay. Ma ix'alhachiwiniha chi ma ixlakp'uxacha an xch'aja', ma wa lakch'ammututucha ixjun.

Wachuncha akxni ma kacha'anacha tukan jaytatnan ma kaputa'a'st'ayacha an ixpap'alhni, ma ixjuncha ch'ot'o'o, ma ix'ancha jalakpuxkawna an jas'at'an an yu wa tat'ajunka chi ma ixja'otnicha an

ixjak'alhnik'an, ma wa an la ix'a'sti cha'a an tan t'ajun an jas'at'a ma ixma'alhtajuy ma wa tacha ma'atam hiloj, ma sliwincha kama'alhtajuya chi li ma lhtataycha an jas'at'a ma kalakscha ixmakinkatanumay ma wa tacha hiloj.

Pus ma wakcha palaktamaknuyi an jas'at'a sta li ma ist'ut'u'ini'ojoycha an ma ixjak'alhni an jas'at'a. Sawalh li ma kakujanta an ixnati an jas'at'a ma kala'ts'ina li ma wa lapuncha t'amalhi an jak'alhni.





Ma ntu lay ixk'atsakan tani ixtalaycha ma wa la'a'ijcha chuncha ixtala'ts'in, lhuwcha chuncha ma la'ts'inkalh mu ma ntu lay xamati ixk'atsay tichini chunchacha ixja'ilhtuy, walh jantu ma'an walh, ma pumatam lapanak yu ma ixjama'lhist'ak'a toroj ma wa laka putrerojo ixwilh ma lhitsunikalhcha ixjas'at'a ma puts'ista tsukulh.



Wachuncha ma alh jalaka'ana mu ma ixk'atsayi tan ixwilh, walh akxni ma cha'alh an laka cha'a ma ntucha tu'u ixwilhchalh an t'aku'. Ma wa yucha an ixch'ajacha ixlak'uk'alh an tan ixlakmuk'ay akxni ixlakp'uxa, chi ma stakcha ixpupuwilh ixla'pa'axi swe'elukut. Ma wa yuchacha stak ixmapupu'ulakanta. Pus akxni ma k'atsakalhi li an ch'ot'o'o ma wa lapanak, ma wa pumatam t'aku yu chuncha ixtapalay.

Walh pumatam lapanak ma ixmispayi anchunu t'aku an yu ma ixwilh la ixtan'ajni lakaak'iwini, pus ma najun an lapanak:

—Pumatam t'aku ikmispay ixtan'ajni lakaak'iwini wilh sawalh tajuni li ma lay tapalay ch'ot'o', ka sna amaj yucha ani malh.



Walh akxni ma asmat'a ma t'asaycha an ch'ot'o', pus ma sa'cha tala'st'ay chi mu ma xjatsasnanta pus ma la'ts'inja li ma s'oyayacha antalh, ma lhapa' lhapa'cha ixjalht'ilitnin. Pus ma najun an lapanak:

—Yucha awint'i an sawalh jast'ut'u'ini xjak'alhnik'an an jas'at'an yu wa tat'ajunka'.

Walh akxni ma la'puslicha chi mu ma tan t'ajun jas'at'a ma wanaj a'lhuwi ixla'pusa sta li ma



ist'ut'u'iniya ixjak'alhni, pus ma makawnilhcha kala'pusli, chi mu ma ixlit'ajun ixpat'alan ma pakxan'ilh. Walh ma xlipu'a't'uycha la'pusli ma makawnipalh walh ma ixlipu'a't'utucha akxni chun ma sawalhcha mala'asijnilh.

Akxni ma mintacha xlipu'a't'at'i ma maklhkanicha, ma tsukulhcha map'a'ani, akxni ma la'ts'in ma s'oyayacha patajulh chi mu an laka potreroj ma sawalh oxi ixja'o'xcha'xnankantalh akxni ma la'ts'in ma lhapa'cha tamachalhi an lakaat'un, chi mu ma ixtalhanani anchunu lapanak ma ntu alh, ma pakxan'ilhi sta katunkulh.



Walh akxni ma tunkulhcha ma ta'alhcha laka'anin chi ma tala'ts'in ma malh wa tacha 'ajni'. Pus ma sa'cha ta'a'la'ts'imay, ma talhawakalhcha, ma lhucha jakilakmak'atsaanikalh yu ma wa niy ixtawilanalh la'acha'anaxni, ma anchacha tachin'olh. Ma ta'a'la'ts'imaycha tuchini ma malhcha.